

思陵典禮紀
思陵勤政紀

恩恩
陸陸
興興
建建
統統



2545

思
陵
勤
政
紀

孫承澤 著

中
華
書
局

思陵勤政紀

叢書集成初編所選借月
山房彙鈔澤古齋重鈔及
指海皆收有此書借月在
前故據以排印

思陵勤政紀

宛平 孫承澤 著

崇禎上于丁卯十二月己酉上因月食下諭曰朕披覽載籍見古昔帝王無不以敬天恤民爲第一義而
其要在用人理財靖亂庇民百司各守其官萬姓共安其業於以消彌災沴鞏固邊防道必由茲邇者上
天垂戒月食太甚朕仰觀元象惕焉不寧傳曰月食修刑得非無辜含冤兆民愁苦致此薄蝕與朕夙夜
旁皇與爾大小臣工共圖挽回災變之策卽如九邊京運不副所出遼黔新餉日增而猶虞其匱嗷嗷嗟
怨實在三軍欲求其充其道何由簪笏盈朝而山林之沉錮者未登啓事位署壅滯堪虞而各衙門散官
冗吏猥濫更甚分毫無益徒吸民膏裁定澄汰豈可不極力講求加派之徵勢非得已近來有司復敲骨
吸髓以實其橐則懷保百姓寬刑省罰潔己愛民責在良吏作何選擇蘇此凋氓目今東西交警戰守迄
無定謀師老財殫尙鮮成算禦侮之道其效安在況且民貧而歲復禡吏竄而法日散大臣憂讒畏譏不
得靖其之圖小臣望氣占風已長紛囂之漸有一於此足干天和爾九卿科道務秉丹誠各陳所見卽敕
諭所未載不妨悉心條畫苟可以安民察吏富國安邊朕將採行之諸臣亦宜痛洗夙習共勵公忠以副
予一人側身脩行之實意勿徒以虛文塞責其敬聽朕命特諭

戊辰正月甲戌上御文華殿講讀畢召六部都察院堂上官入輔臣及講官侍班上諭曰前因月食朕下

詔令諸臣各條利弊。近科道雖有章奏。茫無定說。部院大臣如何不見條議。還著各陳所見。以憑裁酌。因出手諭示之。各臣叩頭起。輔臣施鳳來等跪奏曰。召對之典久廢。皇上勵精舉行。眞聖朝第一美政。天下何憂不治。臣等不勝歡忭。上曰。卿等各修職業。以佐平康。朕與卿等共之。輔臣叩頭謝。勅曰。朕聞除奸賞俊。人主之大權。畢力竭忠。人臣之大節。故必藉勸懲以維法守。戒覆轍以勵新圖。今爲爾文武百官明詔之。邇者逆惡罪樞。表裏爲奸。招結羣狐。盜竊國柄。上累先帝之明。下結萬民之怨。此固爾諸臣所耳聞目見者也。幸天厭大奸。早正國法。蠶孽盡洗。內外廓清。卽爾諸臣才品各有短長。立身各有本末。殷鑒不遠。其可忽諸。自今爲始。務要滌濯肺腸。各修職業。勿得苟懷私圖。致債國事。動諉之權。奸掣肘不得自行。其志。今大奸旣除。職掌還之各司。而猶不致忠竭節。亦非以事朕也。大要爲國節財。爲民擇吏。固圉者以封疆爲重。守土者以民生爲本。其有挾私壞公。逞臆熒聽。不從國家起念。專以窺覷妄營者。朕不時廉察。決不輕貸。一切奏議有關國計者。遵我祖宗舊章。不得妄議紛更。其惟大法小廉。柔遠事邇。以佐朕平明之治。特諭。

戊辰八月甲午。上諭。左右史記言動。及諫官隨宰相議事。皆史冊美規。以後除文華商確外。召對諸臣。仍用記註及諫官二員。如議行。

上諭。朕自御極以來。夙夜焦勞。惟茲封疆民瘼。圖維在念。而邊備積弛。閭閻久困。臣工習俗相沿。尙牽情面之故套。政事奉行不實。徒誇紙上之空言。故屢召平臺。時廬商確。期振惰窳之弊。一新明作之猷。第召

見以時。則情意未洽。咨詢有間。或參酌未詳。朕欲與大小臣工。日相晉接。共籌庶務。而諸司各有職掌。辦理各有公署。宜召類煩。恐滋耽閣。惟是輔臣職任股肱。誼協心膺。稟擬挈封疆之要領。獻納闢庶政之權。與呼吸聯通。斯爲最切。今後除盛暑祁寒之外。朕當時御文華。一切章奏。與輔臣面加參詳。分別可否。務求至當。爾大小臣工。各宜精白乃衷。靖共爾位。有官守者。恪修職業。無飾虛文。而墮實事。有言責者。殫竭悃誠。無昧自心。而恣剿說。其事關奏對。論宜剖晰者。仍不時傳宣。面垂詢察。核舉廢以程勤惰。按是非以辨貞邪。奉公有特簡。徇私有顯罪。一洗欺玩頹靡之習。共收奮庸熙載之功。爾等欽哉。故諭。

戊辰六月十二日。禮部接出聖諭。朕惟國本于民。民艱惟食。今三伏過半。酷暑不雨。秋禾將枯。農田失望。朕心晝夜靡寧。實我君臣治理失宜。愆咎干和所致。朕齋戒文華。痛加修省。爾百官除照部題脩省外。仍各住公署。洗心省愆。各衙門簡舉沉閑事務。三法司清理刑獄。除關係封疆錢糧重大事情。顯然不必議者外。其餘偷盜人命婚姻田土攀誣干連等項。詳加辨別結正。口豁者勒限完銷。順天府宛大二縣。各理其獄。附近州縣刑獄。著巡按御史清理。各道府州縣官。都各設法安輯地方。拯救災患。如發倉賑飢。遠糴平糶。停訟禁罰。嚴羨餘。修舉保甲。窒遏奸萌。務使旱不爲災。民不爲盜。境內祀典神祇。精虔祈禱。爲民請命。其前項條件。畿輔省直一體通行。該撫按仍將遵奉事宜。各照遠近次第奏報。朕雖端拱。慮切民依。每念玉食萬方。思以禔福億兆。爾中外大小各官。受朝廷俸祿。皆下民膏脂。目擊災黎。心寧忍。務須虔修實政。撫綏窮閭。感召天和。馴致豐稔。用副朕敬天勤民至意。禮部便傳與各衙門通知遵行。特諭。

壬申之春久旱不雨。三月十三日上召禮部尙書黃汝良等至會極門傳諭。爲時將入夏。農事方殷。雨澤未敷。深軫朕懷。著禮部擇日祈求。所有應行事宜。查明開寫具奏。是日卽微雨。十四日復有遣官分禱。小臣工實圖修省之命。十八日雷雨大作。然俄頃卽止。十九日上出宿文華殿。齋居素食。期必得雨而後還宮。至二十二日靈雨大作。遠近沾足。是時四川道御史路振飛。有天心仁愛。聖慮焦勞。謹陳祈禱實事。懇賜施行一疏。謂本年自春徂夏。雨澤未施。三農失望。致厯皇衷。齋居祈禱。卽此一念。便可回天。立見甘霖覃敷。原隰均沾。大有之書。史臣珥筆待矣。詩曰。習習谷風。以陰以雨。言陰陽和而後雨澤施也。蓋天氣不下。降地氣不上。則不雨。天氣欲下降。地氣欲上升。中有颿風邪霧間之。亦不雨。請譬之。君則天也。臣子則地也。我皇上痛四海之內。兵革未息。重賦繁刑。民不堪命。日思得良臣良牧。以奠安此子遺。中外臣工悠悠忽忽。大臣以固寵爲榮。小臣以無事爲福。居端揆之地者。燮理無聞。擁卿寺之堂者。經綸罔見。自言官逮問後。時政利弊。悉爲緘口。有言責者可羞也。自內官分遣。臨事擔當。羣思却步。有官守者可厭也。求其舉賢讓能。反躬自責。以恤天命。以回天變者。終不見一人焉。大哉王言。謂大小臣工俱實圖修省。務感格。良有見於大臣小臣往日之不脩不省。不實心盡職無二也。爲人臣聞之。寧不跼蹐欲死。此何異於天氣降而地氣不升哉。故時久不雨。天心之警戒深矣。臣愚以爲素服角帶。祇成故事。朝夕跪拜。亦是虛文。惟皇上虔惕之際。御文華殿。集閣部大臣。實心講究近日國家之治亂如何。政事之得失如何。生民之休感如何。賢不肖之進退如何。凡所以仰體天心者。卽使大小臣工。仰體聖心。刻期舉行。流膏布澤。則九

重之雨露。早已徧灑于垓塹。瞻仰昊天。自不禁浩蕩之恩矣。

戊寅火變。屢見戶科給事中章正宸疏云。昨藥局被火。殞壞官民匠役廬舍無算。因憶去年黃道周占驗。非誣矣。天道遠。人事邇。鄭不復火。修禳有徵。比新局火以後。皇上所諭求言空獄。堯舜之用心也。然火變洊臻。天告曉人。具陳深切。臣憂心如焚。灼中宵思過。火于德爲禮。禮者別宜而從地。意者庶民議論舛乖。職業曠溺。禮教不修。致斯也。以禮使臣如皇上。無可顧忌。奈何不展布四體。重報禮以幹王事。臣姑列其近者。凡是非斷乎朝。美譽歸于主。大臣何名之有。又何德之避焉。且皇上從未以沽名市德疑大臣也。頃大臣揭救鄭三俊。錢謙益則爲是言。以乞憐疑皇上甚矣。是一無禮也。史堊被參候訊。初辨則曰時局。再辨則曰時局。夫此時何時。堯舜在上之時也。明揚側陋。漸有治徵。卽讒說殄行。要亦放殛盛軌。烏得以清時爲懟。斥稱無忌。思籍衆口。汗聖治乎。是又一無禮也。朝廷一番令甲。一番私營。非陳啓新循職抄參。則計處不謹之張樞。方借城工復銓職矣。死灰然而天下謂考功之法。可以銀錢贖。亦可越俎謀也。是又一無禮也。官有守如農有畔。磨勘試卷。係該科職掌。明旨煌煌。今閣臣薛國觀卽舊科臣。批抹雖嚴。糾參不早。所以豫疏引陳。願偕吏議。束躬待罪。自量已審。臣無庸贅。但慮六垣職掌。私尤而效之。各徇愛憎。互爲隱蒙。首鼠漸亡紀也。是又一無禮也。災異頻仍。忠愛者尙懇慨發罪己之疏。宣布史館。昭示內外。何物李鳳鳴。輒稱善言不可退星。猶夫揮戈不可却日。以史傳美談。儕諸俳誕。將今日聞災憂憫。出內府金帛恤至意。悉爲迂濶乎。說者謂其首先應募。故與正論矛盾。雖不可知。而抹煞災異。誦調誣天。是又一無禮。

也。總之議論不清，必無職業，職業不舉，必無事功。禮教廢頹，類條例見，以陛下明智，誠深思天地之心，近察羣小之失，破大臣之所疑以定，是非斥邪人之所借以中，揚過杜廢官貪緣之竇，核有司狗隱之端，以禁絕淫諛，崇登雅正，則赫赫大災，庶幾消弭。語曰：齊刑不如齊禮，願庶工稍省臣愚之言，感悟大變，著賊去僞，勵精回天，不然，災害之來未有已，臣滋恐矣。

戊辰七月上傳，欽天監推算日食前後刻數，俱不對。天文重事，這等錯違，卿等傳與他，姑恕一次，以後還要細心推算，如再錯誤，重治不饒。禮部因具疏請改修歷法，奉旨：歷法皇祖朝曾議重修，今日食刻數復差，允宜更正。依卿等所請修改，一應事宜，再著另行具奏。禮部復奏略謂：治歷明時，古人以爲重事，臣等不敢繁引，止據元史所載，以宰相王文謙樞密張易主領，裁奏于上，仍命左丞許衡參預其事。王恂郭守敬並領太史院事，分掌測驗，推步于下，而又博徵楊恭懿諸人助之，然猶五年而成，六年而頒行，十年而進書五種二十六卷，後三十年間，續進書九種七十九卷，則成之甚難矣。高皇帝初定天下，典章散失，止存授時成法數卷，方爲大統歷，僅能依法布算，而不能言其所以然之故。後來有志之士，亦止將前史歷志揣摩推度，并未有守敬等數年實測之功力，又無前代灼然可據之遺書，所以言之而未可行，用之而不必驗也。按大明會典，凡天文地理等藝術之人，行天下訪取，考驗收用。宏治十一年，令訪取精通天文者，試中取用。嘉靖三年，科臣諫議部覆保舉，于是以戶科給事中樂鵠、工部主事華湘俱陞光祿寺少卿，提督欽天監事。然二臣終不能改守敬之舊，所以至今寢閣。臣等考之周禮，則馮相與保章異職，稽之職

掌。則天文與歷法異科。蓋天文占候之宜禁者。懼妄言禍福。惑人誣人也。若歷法則惟敬授人時而已。豈律例所禁哉。今議通行省直。不拘官吏生儒草澤布衣。但通曉歷法者。具文前來。但近世言歷諸家。大都宗郭守敬舊法。比于現在監官。藝猶魯衛。無能翹然出于其上。也。至于歲差環轉。歲實參差。天有經。地有緯。列宿有本行。日月五星有本輪。日月有其會。惟西國之歷有之。高皇帝命吳伯宗與西域馬沙亦黑。翻譯歷法。蓋以此也。萬歷四十年。監正周子愚建議。欲得參用。務令會通歸一。今宜取其說。參用西法。果得會通歸一。卽本朝歷法。可以遠邁前代矣。

回回歷爲西域馬哈麻作。元末其歷始入中國。算法視授時歷稍捷。然僅數耳。而不知歷理。行之一時。未有人而不差者。至于郭守敬之歷。能通其消長之法。聖人復起。不能易也。

大統歷雖本於郭守敬之授時歷。然高皇帝精於觀天。而特令劉基召集天下律歷名家。赴京詳議。復自製觀盤。天文分野諸書。誠可萬世以爲典要者。自西洋之法入中國。上海徐光啓專習之。後湯若望。嗣利瑪竇之教。而李天經黃應遴等。信奉益堅。進新歷書一百四十餘本。日晷星晷。星球星屏。闕諸器。然其法與舊法稍異。舊法用日法。計日定率。西法用天度。因天立差。舊法用黃道距度。西法用黃道緯度。之不同。欽天監官生連疏爭之。禮部因議另立新法一科。上允之。

崇禎十四年十二月二十八日。禮部疏略。自古歷法。輒數十年改。而守敬之歷。已行之三四百年矣。小差者。惟日月交食。時同刻異。無大懸絕。至置閏之差。起於春秋分所差二日。而西歷定分之日。卽舊註晝夜

各五十刻之日也。在今日西法較密。在異時亦未能保其不差。

丁卯十二月上諭。各衙門章奏。未經御覽批紅。不許報房鈔發洩漏機密。一概私揭。不許擅行抄傳。違者治罪。

上傳。內閣本內。凡遇天地祖宗列后字樣。皆要出格。朕不敢與並列。卿等傳與各衙門欽奉遵行。

上傳。章奏冗長。不便省覽。以後各衙門條陳章疏。務要簡明。其字不出一千。如詞意未盡。不妨再本具奏。著通政司申飭。

上諭。諸臣章奏。做古人貼黃之法。自撮節要。粘原本進覽。以便執要。著爲令。

時給事中宋鳴梧有疏云。召對曠舉。再做世廟西內當直之法。則諮訪便。一切章疏。令通政司限字。並做宋人帖黃之法。則省覽便。又會典更宜重修。邱濬衍義補。宜刪其煩複。而增成化以後之新政。則昭代之典籍光矣。

戊辰二月辛丑。上傳。祖宗設立部科衙門。各有職掌。內外覺察。法甚明備。乃近來人情玩愒。廢弛成風。卽如各項章奏。或奉旨而科抄久不到部。或已抄而該部久不題覆。以致緊要事務。率多稽遲。殊非政體。除已往不究外。今後各衙門。務將已發未發覆奏事件。作速覆奏。不許違誤。自元年二月爲始。一切發行內外章奏。俱限十日內題覆。該衙門仍立考成。著實遵行。部科互相查勘具奏。上諭。近來誥敕文字。繁稱過情。殊爲非體。以後撰擬。不由詞臣繕寫。不由中書者。著實查駁。

尙寶司司丞李日華疏。明文教四事。一曰代言。王者誥敕。必假詞臣之手。所謂口代天言。何如鄭重者。須于獎許之中。微含訓戒。日星霜露之氣。備焉。近典誥敕者。輒徇求者之意。駢麗極工。甚有曲諛微美。代祝壽祺。王言之褻甚矣。亟宜敕諭詞館禮曹。須選唐宋內外二制爲體式。一洗陋習。一曰進言。臣子精白一心。敷陳奏對。宜何如恪愼。惟因神祖久御。厭薄臣下翳浮。章奏閣置。攻訐不休。堅賜容覆。今則字字俱經。審覽。安得不擇一二侮慢者示創懲乎。一曰法言。祖宗創制立法。事事修舉。而又授之以章程。諸司執掌。一書備矣。列聖繼起。間有因時更定者。目爲條例。以待後來之援引。惟是新舊雜陳。猾胥任其出入。吏弊不清。莫可究詰。臣以爲部院諸司。各宜歲委屬官一員。專理條例。遇有更張。隨時酌定。修入源潔流清。是助成大化之基也。一曰立言。凡一代必有一代著述。國憲朝章。方輿地志。隨時修纂。皆足從今傳後。宜特諭各省直學臣。令郡國各舉耆儒。將郡邑山川形勝。戶口人物。商產田畝。編輯成帙。類送學臣。轉申禮部。爲纂修圖經張本。以備掌故。乃興起實學之權輿也。

己巳上諭六科。邇來戎馬倥偬。機務煩劇。明旨非不森嚴。奉行尙多遲慢。欲令計時集事。法當委任責成。爾等表裏六曹。舊有註銷之規。今令再行申飭。各掌印官。選委給事中一員。查理六曹。奉旨應行事務。某項某日做起。某日完結。次第情節。勒限奏報。少有違玩。立付白簡。定行責治。如爾等自墮職業。玩忽不遵。或議論囂紛。致令掣肘誤事。一并究處。特諭。

戊辰三月。重修光宗實錄。成熹宗神宗二廟實錄。並修光廟紀事。僅一月。實錄先成。進覽後。因國本紅九

二事載筆者多煩詞。特命重修史臣刪削。書成進呈。

國子監司業倪嘉善條議。將通監諸生。月三課文。又酌一歲之中。合課經書後場於一日。而卷必兩縫。閱必公同。請託必嚴。奸弊必絕。六堂定六名。不分舉貢例廩。惟才是視。其卷仍備正副。封進御覽。以憑欽定。旨下之後。移咨吏部。興以出身。舉人照先年舊例。授以京銜。歲貢恩選。或除州縣正官。或學正教諭。俱准與選。廩附例廩。照歲貢量行減年。民生倘有英才拔起。亦照附例。歷滿俱選。于循資歷級之中。寓鼓舞變通之術。太學將多佳士矣。臣又以爲德行之激勵不先。名教之綱維奚藉。宜於歲試發案之先。確訪行脩之士。至期特拔一人。詳核生平備著實蹟。並呈御覽。旨下一體移咨吏部。選授教授。若敗節踰閑之士。亦每歲查一二人。註名于籍。以憑懲儆斥革。旨允行。

六年癸酉二月初三日。上諭。祖制設科取士。專爲致治求賢。近來士習日偷。貢舉失當。人才鮮少。理道不張。由督學教諭訓導各官。董率乖方。培養無術。盡失舊制初意。以致朝廷不獲收用人之效。朕思士子讀書進身。乃人才根原。必宜首重德行。幼學壯行。如生平果係孝悌廉讓。自然做官時不貪不欺。盡忠竭節。何必專工文藝。據會典及提學敕書內。敦尚行誼。以勵頹俗。不專論文優劣。開載甚明。近來通不遵行。至小學諸書。以及州縣俱有社學。原欲養蒙育德。敷教儲材。近來全不講論與舉。其士子自童時入塾。以迄應試登科。只以富貴溫飽爲志。竟不知立身修行。忠君愛國之大道。如此教化不明。士風吏治。安得不日趨卑下。朕惟祖宗朝求才用賢。原不拘科目。至考試文藝。原欲因言徵人。亦非專尚浮詞。務華遺實。今欲

祇遵祖訓，起敝還醇。童生必先入社學，遇試先查德行。自儒童以及鄉會，須有實蹟，方許入場。異日收行，考官揆論，又教官爲士子師長，化導最親，舊制甚重，近皆以衰庸充數，教術全廢。此尤士風不正之源。今設法興起，著吏禮二部同都察院及該科詳議，明確具奏。至海內之大，豈無潛修碩德、純孝鴻材、清志剛正、實堪大用者？更宜特拔一二，以示風勸。至於科道不必專出考選，館員應令先歷推知，并著酌議來行。癸酉六月，上諭取士大典，全在主考得人。著各衙門慎選咨送，不得但拘資次，亦不許聽人規避，攙營降罰者，不必議差。其省直分考各官一體飭行。

壬午秋試，楚闈擬正主考郭之祥，副主考沈迅。上點用之祥，於迅名貼一浮紙云：越序營差，送闈部，遂以戶科左給事中孫承澤請始點用。時正考已先行五日矣。

崇禎戊辰，廷試卷閣，擬劉若宰第一，莊應會次之。上翻駁再三，竟用劉第一，而抑莊爲二甲首。其第二第三皆特拔。第三管紹寧策內誠字少一撇，御書足之，因自號誠齋。

甲戌廷試，間擬李焜爲第一。上在文華殿翻駁，問初進十二卷頃之。閣臣趨出入閣，再搜十二卷以進。特拔第二十三卷劉理順爲第一，而李焜爲二甲首。第二楊昌祚，第三吳國華，皆特拔也。

庚辰廷試，上御與張蓋下丹墀，徧觀諸進士對策。及十六日進呈，十七日上忽召四十人入對文華殿，遂拔通州魏藻德第一，鄞縣葛世振，靜海高爾儼，俱一甲，而復拔趙玉森、姚宗衡、劉瑄、孫一脈，嚴似祖爲簡討，命蔣德璟、王錫賓教習之。周鼎等爲科道吏兵部主事有差。

是日文華召對。問內外交誼。何以復讐雪恥。魏藻德奏謂。以臣所見。不離明問之中。使內外諸臣。皆知所恥。則才能自生。功業自建。累數百言。上爲傾耳久之。遂定爲第一。

癸未廷試。在九月十五日。是年以兵事。會試改八月。按建文癸未。以靖難兵渡江。改本年八月會試。天順癸未。以貢院火。改本年八月會試。迨是科而三。皆癸未也。

福建人顏茂猷。于天啓甲子鄉試。崇禎甲戌會試。俱以五經二十三篇得中式。其鄉試則外簾止謄四書三篇。易經四篇。爲考官祁彪佳所取。及放榜。始知爲五經也。會試則知貢舉林鈺特上疏言。茂猷五經。上許俱謄。於是五經房同考。俱有批語。而文太史震孟。以易經收之。及殿試在二甲第二。而禮部刻會試錄。上特命題名于會元李青之前。曰欽賜。亦異典也。

壬申十月。禮科張國維題。邇者特謄鄒元標等十餘人。其於理學文章。忠諫節義。殆兼盡矣。然自鄒忠介。馮恭定。顧端文。而外。豈無壇壝孔孟。羹牆濂雍者乎。趙忠毅。高忠憲。楊忠烈。魏忠節。周忠介。而外。豈無葦弘血碧。范滂丹心者乎。王莊毅。而外。豈無功在國本。品著抨彈者乎。唐襄文。而外。豈無羽翼經籍。鼓吹休明者乎。滿毅愍。而外。豈無斷脰決腹。一瞑而萬世不視者乎。或異時而踵相接。或因事而典稍殊。幽壤久鬱。直道在人。表章誠不容緩。

癸酉六月。南京戶部侍郎呂維祺。以議謚遜國諸臣。而謚冊未載卓敬。因具在戶言戶一疏。卓爲建文時戶部侍郎也。并及謚冊未載者。吏部尙書周嘉謨。戶部侍郎周汝登。參政羅汝芳。左僉都御史左光斗。御

史袁化中、李應昇、黃尊素、工部郎中萬燦等。又及本鄉戶部尙書張孟男、刑部侍郎呂坤、吏部郎中贈光祿寺卿孟化鯉、提學副使何景明、吏部郎中蘇繼□、戶部主事尤時熙、山西參政王以晤、貴州巡撫王三善、遼東兵備崔儒秀等。

先是天啟三年癸亥，科臣成明樞請禮部速修易名之典，謂洪武至穆廟時，得易名者五百八十餘人。神廟三十五年至三十七年，議定二十九人，及四十五年，又有四十四人。

崇禎五年，禮部尙書覆禮科都給事中張國維議諡疏，奉旨：「諡法有關風勵，依議詳咨確覈，務協公平，不得徇私憑臆，致乖大典。其□單仍勒限報部，毋再稽遲。」至十五年，部又覆察得原疏，請諡舊例。五年一舉，當時已缺至十二年，而今又遲十年矣。自古帝王治天下，惟有賞功罰罪，而諡則賞罰之尤大者。近日名教不靈，廉恥道喪，不知忠孝節義爲何物，則諡法眞勵世磨鈍急務也。除鄒元標忠介、馮從吾恭定、顧憲成端文、王德□莊毅、趙南星忠毅、高攀龍忠憲、楊漣忠烈、諸臣理學事功、忠諫節義，皆一代之最，已經賜諡外，據科臣疏，首言革除諸臣，次言軍功，而於會典所稱節概助猷二語，尤致慎焉。大要節概以死忠爲上，如革除中卓敬、鐵鉉、景清、方孝孺諸人，不待言矣。近之忤璫，如左光斗、周宗建等，抗節如孫承宗、洪承疇、盧象昇等，殉賊如傅宗龍等，指尙不勝屈也。助猷以軍功爲上，如萬歷中平倭、平播、平倭三大案，文武功多可書。近日之何可綱、曹變蛟，以功兼死，尤爲慘烈，亦不可勝屈也。而有宜申飭者三焉：先臣邱濬謂諡兼用美惡，王世貞亦曰：「高皇帝子子秦王諡愍，魯王諡荒，況臣下乎？竊謂文臣二品以上皆宜諡，助威。」